



Republika e Kosovës
Republika Kosovo - Republic of Kosovo
Kuvendi - Skupština - Assembly

Ligji Nr. 04/L-114

PËR PASURIMIN E MIELLIT

Kuvendi i Republikës së Kosovës;

Në bazë të nenit 65 (1) të Kushtetutës së Republikës së Kosovës,

Miratton

LIGJ PËR PASURIMIN E MIELLIT

KREU I
DISPOZITA TË PËRGJITHSHME

Neni 1
Qëllimi

Ky ligj përcakton rregullat që zbatohen në pasurimin e miellit për konsum, si njëra nga mënyrat që ka për qëllim parandalimin dhe reduktimin e sëmundjeve të cilat shkaktohen nga mungesa e hekurit dhe acidit folik

Neni 2
Fushëveprimi

Ky ligj zbatohet me qëllim të përcaktimit të bazës ligjore, për të rregulluar dhe ofruar popullatës së Republikës së Kosovës miell të pasuruar me hekur dhe acid folik në mënyrë të obliguar, dhe sipas gjendjes nutritive dhe në baza vullnetare edhe me vitaminë A, B12 dhe Zink.

Neni 3 **Përkufizimet**

1. Shprehjet e përdorura në këtë ligj kanë këtë kuptim:

- 1.1. **Mielli** – produkt i përfituar nga bluarja e grurit;
- 1.2. **Mielli i pasuruar** – mielli të cilit i është shtuar një apo më shumë përbërës si: vitamina, minerale, proteina, aminoacide, acide alifatike;
- 1.3. **Mineralet, vitaminat, mikronutrientët** – materiet ushqyese të domosdoshme që ruajnë dhe ndikojnë në shëndetin e njeriut;
- 1.4. **Pasurimi i miellit** – procedura e pasurimit të miellit me minerale dhe vitamina;
- 1.5. **Subjektet afariste** – prodhuesit dhe tregtarët e miellit që bëjnë importimin, eksportimin, prodhimin, paketimin, deponimin dhe shitjen e miellit;
- 1.6. **Acidi folik** – vitaminë e grupit B, që parandalon anomalitë e fëmijëve gjatë shtatëzarisë dhe sëmundjet e sistemit kardiovaskular;
- 1.7. **Hekuri (Fe)** – mineral i rëndësishëm për krijimin e eritrociteve;
- 1.8. **Vitamina A** – është e rëndësishme për përforcimin e imunitetit, ndihmon të pamurit dhe lëkurën e shëndoshë;
- 1.9. **Vitamina B12** – është e rëndësishme për krijimin e qelizave të gjakut;
- 1.10. **Zinku** – mineral i rëndësishëm në ndërtimin dhe rritjen e qelizave, në rritje dhe zhvillim, ndihmon imunitetit dhe mbron nga sëmundjet;
- 1.11. **Parandalimi** – marrja e masave të nevojshme për të reduktuar dhe evituar shfaqjen e sëmundjeve;
- 1.12. **Afati i përdorimit** – koha brenda së cilës mielli është i sigurt për përdorim;
- 1.13. **Afati i ruajtjes** – periudha kohore brenda së cilës mielli ruan cilësinë e tij,
- 1.14. **HACCP** - Analiza e Hazardit dhe Pikat Kritike të Kontrollit;
- 1.15. **AUV** – Agjencia për Ushqim dhe Veterinari;
- 1.16. **Ministria** – Ministria përgjegjëse për Bujqësisë, Pylltarisë dhe Zhvillimit Rural;
- 1.17. **Qeveria** – Qeveria e Republikës së Kosovës.

Neni 4 Kompetencat

1. Ministria përkatëse, përmes këtij ligji, krijon rregullativën e pasurimit të miellit duke:
 - 1.1. hartuar dhe zhvilluar politikat për pasurimin e miellit me hekur dhe acid folik;
 - 1.2. pranuar dhe përkrahur programin i cili rregullon pasurimin e obligueshëm të miellit me hekur dhe acid folik;
 - 1.3. rregulluar dhe kontrolluar sigurinë e miellit nga institucionet përkatëse, sipas kompetencave të përcaktuara;
 - 1.4. rregulluar dhe kontrolluar cilësinë e miellit nga institucionet përkatëse;
 - 1.5. kontrolluar kushtet e deponimit dhe shitjes së miellit të pasuruar në pajtim me legjislacionin në fuqi, nëpërmjet, organeve ekzekutive inspektoratet;
 - 1.6. bashkëpunuar me vendet tjera në fushën e pasurimit të miellit.

Neni 5 Siguria dhe cilësia e miellit të pasuruar

1. Pasurimi i miellit është i obligueshëm me hekur dhe acid folik dhe zbatohet në bazë të standardeve ndërkombëtare.
2. Pasurimi i miellit mund të bëhet, në bazë të gjendjes nutritive dhe vullnetare edhe me Vitaminën A, Vitaminën B12 dhe Zinkun.
3. Ministria me akt nënligjor përcakton standardin për pasurim të miellit, kontrollin e sigurisë dhe cilësisë së pasurimit të miellit.

Neni 6 Përgjegjësit e subjekteve për sigurinë dhe cilësinë e miellit të pasuruar

Subjektet afariste që merren me aktivitet ekonomike në fushën e prodhimit, transportimit, importimit, paketimit dhe shitjes së miellit të pasuruar janë të obliguar t'i garantojnë konsumatorit siguri dhe cilësi në bazë të kërkesave të përcaktuara me këtë ligj.

Neni 7
Kompetencat e institucioneve për kontrollin e cilësisë dhe
sigurisë së miellit

Institucionet e autorizuar dhe të akredituara kryejnë vlerësimin e kontrollit të miellit të pasuruar në pajtim me dispozitat e këtij ligji.

Neni 8
Parimet

1. Parimet kryesore në fushën e pasurimit të miellit janë:

- 1.1. furnizimi i popullatës me miell të pasuruar;
- 1.2. prodhimi, importimi, deponimi, transportimi, shitja dhe përdorimi sipas këtij ligji;
- 1.3. pasurimi i miellit sipas standardeve ndërkombëtare;
- 1.4. monitorimi i sigurisë dhe cilësisë sipas standardeve.

Neni 9
Kërkesat për miell të pasuruar

1. Subjektet afariste obligohen të sigurojnë pasurimin e miellit të tipit 400 dhe 500 me hekur dhe acid folik.
2. Subjektet afariste mund ta bëjnë pasurimin e miellit edhe me Vitaminë A, Vitaminë B12 dhe Zink.
3. Pajisjet dhe lëndët e para për pasurimin e miellit, duhet të jenë në përputhje me këtë ligj dhe aktet nën ligjore.
4. Mielli i prodhuar nga gruri i rezervave dhe fondet shtetërore i nënshtrohen këtij ligji.
5. Mielli i importuar në Republikën e Kosovës, duhet të jetë i pasuruar me hekur dhe acid folik sipas këtij ligji.

Neni 10
Paketimi dhe etiketimi i miellit të pasuruar

1. Paketimi i miellit të pasuruar, duhet të jetë sipas rregullave që të sigurojë ruajtjen e vitaminave dhe mineraleve të përcaktuar sipas standardeve ndërkombëtare.

2. Paketimi i miellit të pasuruar, duhet të përmbajë këto informata në etiketë:

2.1. tipi i miellit;

2.2. përmbajtja dhe sasia e elementeve shtesë në miell, lagështia dhe hiri;

2.3. data e prodhimit;

2.4. data e skadimit;

2.5. kushtet e ruajtjes;

2.6. fjala “I PASURUAR” me hekur dhe acid folik, vitaminë A, vitaminë B dhe Zink apo shenjë identifikuese dhe të vendoset në etiketën e paketimit;

2.7. shenjat e subjektit afarist të jenë në paketim.

3. Mielli i ripaketuar, duhet të përmbajë të gjitha informatat e përcaktuara si në paragrafin 2. të këtij neni, si dhe emrin e prodhuesit.

4. Kushtet e përcaktuara në, paragrafin 2. të këtij neni rregullohen me akt nënligjor nga Ministria përkatëse dhe Ministria e Tregtisë dhe Industrisë

Neni 11

Kriteret për cilësi dhe siguri të miellit të pasuruar

1. Deponimi, transportimi dhe shitja e miellit të pasuruar, duhet të kryhet në kushtet që sigurojnë ruajtjen e cilësisë së miellit.

2. Deponimi i miellit të pasuruar lejohet në objektet që i plotësojnë kriteret sipas parimeve të HACCP-it.

3. Subjektet afariste që shkaktojnë humbjen e cilësisë dhe sasisë së përbërësve gjatë deponimit, transportimit ose shitjes së miellit të pasuruar, të vërtetuara me analiza laboratorike ju ndalohet shitja dhe ju pezullohet ushtrimi i veprimtarisë.

4. Në pajtim me rezultatet e testimit, miellit mund ti ndërrohet destinimi i tij për përdorim.

5. Ndalohet importimi dhe shitja e miellit pa dokumentacionin përkatës:

5.1. certifikatën e analizave laboratorike;.

5.2. deklaratën e prodhuesit;

5.3. origjinën e miellit;

5.4. kushtet përkatëse për transportim, deponim dhe shitje të miellit të pasuruar;

5.5. etiketën përkatëse;

5.6. datën e prodhimit dhe të afatit të përdorimit.

KREU II DISPOZITAT NDËSHKIMORE

Neni 12 Kundërvajtja

1. Me gjobë për kundërvajtje prej një mijë (1.000) deri një mijë e pesëqind (1.500) Euro ndëshkohet për kundërvajtje subjekti afarist që nuk e bënë pasurimin e miellit sipas nenit 9 të këtij ligji.

2. Me gjobë në shumën prej pesëqind (500) deri në një mijë (1.000) Euro ndëshkohet personi përgjegjës i subjektit afarist që vepron në kundërshtim me nenin 9 paragrafi 1. të këtij ligji.

3. Me gjobë në shumën prej tetëqind (800) deri në një mijë e pesëqind (1.500) Euro ndëshkohet për kundërvajtje subjekti afarist kur paketimi i miellit të pasuruar nuk i përmban informatat e përcaktuar sipas nenit 10 paragrafi 3. dhe 4. të këtij ligji.

4. Me gjobë në shumën prej një mijë e pesëqind (1500) deri në dy mijë (2.000) Euro ndëshkohet subjekti afarist i cili nuk e zbaton kriteret e përcaktuara sipas nenit 11 të këtij ligji.

KREU III DISPOZITATA KALIMTARE DHE PËRFUNDIMTARE

Neni 13

Ministritë përkatëse obligohen në afat prej gjashtë (6) muajve të nxjerrin aktet nënligjore për zbatimin e këtij ligji.

Neni 14

Të gjitha të hyrat që rrjedhin nga zbatimi i këtij ligji derdhën në Buxhetin e Republikës së Kosovës.

Neni 15 Hyrja në fuqi

Ky ligj hyn në fuqi gjashtë (6) muaj pas publikimit në Gazetën zyrtare të Republikës së Kosovës.

**Ligji Nr. 04/L-114
30 gusht 2012**

Kryetari i Kuvendit të Republikës së Kosovës,

Jakup KRASNIQI